



USIMPHIWE Majosi onenkampani efaka o-ceiling board useguguzole intsha ukuba ingene emabhizinisini ewathandayo
Isithombe: SITHUNYELWE

USimphiwe uyibambe noyise kowama-ceiling board

BONISWA MOHALE

USOMABHIZINISI osemncane usedonse ngendlebe ontanga yakhe ukuba bayeke ukukhangeza kubazali kodwa basukume bazizamele ukuze baqede inhlupheko. UMnuz Simphiwe Majosi (24) unebhizinisi lokufaka o-ceiling board alisungula ngo-2002 elekelelwa nguyise. Leli bhizinisi iJozi Bros Decorated Ceiling Boards and Roofing lenza o-ceiling board abahlotshisiwe kuhle kwalabo abatholakala emahhotela nasezindaweni zomntakabani. Ngokusho kukaSimphiwe ukungena kuleli bhizinisi kwakulula ngoba wathola icebo ngesikhathi kufike abantu ababezolungisa u-ceiling board kubo. “Ngababuza ukuthi ufakwa kanjani, zitholakala kuphi izinsiza kusebenza nokunye okuningi. Ngabe sengikhuluma nobaba ngimcela ukuthi asivule eyethu inkampani sitholele abantu umsebenzi. Ubaba wangivumela sayivula le nkampani manje sesinabasebenzi abahlanu,” kusho uSimphiwe. Uthe uma bematasa bakwazi ukwakha amatoho

amahlanu kodwa bona baqashe ngokugcwele abantu abahlanu. Osomabhizinisi abancane bavamise ukukhala ngemali yokuqala ibhizinisi, uSimphiwe uthi yayingeyona inkinga ngoba waqala ukubeka imali eseneminyaka engu-14 ayeyinikwa ngabazali ukuba ayidle esikoleni. Le mali wayengayidli kodwa wayeyibeka ukuze athenge izinto azidingayo. Uthi lo mkhuba ukhule nawo kwaze kwafika isikhathi sokuthi aziqalele ibhizinisi. Ube eseveza ukuthi ibhizinisi lakhe lihle ngoba alidingi ukuthi ahlale esehhovisi kodwa okubalulekile wukuthi ahambise abasebenzi noma kuphi lapho bedingeka khona. “Ngisebenzisana nobaba ebhizinisini kwesinye isikhathi nguyise ohambisa abasebenzi uma ngimpintshekile. Engikuthandayo ngalo wukuthi akufanele uhlale phansi kodwa uhlale uhamba izindawo ezahlukene ufaka o-ceiling board,” kusho uSimphiwe. Ebuzwa ukuthi wafundelani esikoleni, uthe ukuthi wenza izifundo ze-Maritime e-Durban University of Technology wabe esethola umfundaze eTransnet.